



Ամսոյս 2-ին խօլերայից բռնուելով, կնքեց իւր մահկանացուն Ատրպատականի Առաջնորդ ՍՏԵՓԱՆՆՈՍ ԵՊԻՍԿՈՊՈՍ ՄԽԻԹԱՐԵԱՆԸ 47 տարեկան հասակում: Հանգուցեալը ժառանգաւորաց դպրոցի լաւ աշակերտներէցն էր: Միաբան եղաւ 1857 թուին: 1863-ին ձեռնադրուեց Սարկաւազ, իսկ մի տարուց յետոյ վարդապետ: 1863—1866-ը եղել է անդամ վանական կառավարութեան: 1866—1867 թ. վարել է Բայազիտի գործակալի պաշտօն, իսկ 1867 թ. նորից նշանակուեց վանական կառավարութեան անդամ և մի տարուց յետոյ ստացաւ ծայրագոյն վարդապետութիւն: 1869-ին ուղարկուեց Տաթևի վանքը՝ իբրեւ վանահայր և յաջորդ, ուր մնաց մինչև 1872 թ: Ապա կարգուեցաւ քննիչ Քիշնևի կալուածական գործերի և հաշիւների և 1877-ից մինչև 1879 թ. վարեց նոյն կալուածների կառավարչի պաշտօնը: 1882 թուի մայիսի 9-ին երջանկայիշատակ Գէորգ Կաթողիկոսից ձեռնադրուեց Եպիսկոպոս, իսկ 1886 թ. մայիսի 14-ին հանգուցեալ Մակար Կաթողիկոսը նշանակեց Նրան առաջնորդ Ատրպատականի թեմի, որպիսի պաշտօն և վարում էր մինչև մահը: Հանգուցեալը պարգևատրուած էր ծաղկեայ փիլօնով, վարդապետական լանջախաչով և եպիսկոպոսական պնակէով: Թողել է մի քանի գրաւոր աշխատութիւններ: Մաղթենք Արարչին, որ հանգուցելոյն երկնային արքայութիւն պարգևէ:



Ամսոյս 1-ին երկարատե հիւանդութիւնից յետոյ Կոջոր ամարանոցում՝ վախճանուեց Թիֆլիսի թեմի Առաջնորդ ՄԱՄԲՐԷ ԵՊԻՍԿՈՊՈՍ ՍԱՆԱՍԱՐԵԱՆԸ 48 տարեկան հասակում: Հանգուցեալը իւր ուսումն առել էր Ս. Էջմիածնայ ժառանգաւորաց դպրոցում 1864 թ. ձեռնադրուել է սարկաւագ, իսկ մի տարուց յետոյ վարդապետ. 1868-ին կարգուել է յաջորդ Գօրւոյ վիճակի, 1871-ին նշանակուել է վանահայր Նոր-Նախիջևանի Ս. Խաչ վանքում 1875-ին կարգուել է քննիչ Նոր-Բայազիդի գաւառի հոգեւոր գործերի, 1877-ին յաջորդ Հին-Նախիջևանի, իսկ այդտեղից — նախանդամ Թիֆլիզի Կանսիսատորիայի և վանահայր Ս. Սարգիս ուխտատեղւոյ: 1883-ին կարգուել է յաջորդ Ախալցխայի վիճակի և մի տարուց յետոյ՝ բարձրագոյն հաստատութեամբ — անդամ Ս. Էջմիածնի Սինոդի: 1886 թ. հանգուցեալ Մակար կաթողիկոսից ձեռնադրուել է Եպիսկոպոս և 1889 թ. հաստատուել է Թիֆլիզի թեմի առաջնորդ, որպիսի պաշտօնում և կնքեց իւր մահականացուն: Մամբրէ Եպիսկոպոսը վարձատրուած էր ծաղկեայ փիլօնով, լանջական խաչով, եպիսկոպոսական սնակէով և Ս. Աննայի 2-դ կարգի շքանշանով:

Մաղթենք հանգուցելոյն հանգիստ և երկնից արքայութիւն:



Օգոստոսի 23-ին հեռագիրը գուժեց մեր տաղանդաւոր բանաստեղծ ՌԱՓԱՅԷԼ ՊԱՏԿԱՆԵԱՆԻ մահը: Թէ որքան մեծ է այդ կորուստը մեզ համար, այդ գիտեն ամենքը: Այո՛, կորուստը անփոխարինելի է և վշտապատ: Նա մեզանից վարձատրութիւն և դափնիներ չէր խնդրում, այլ որպէս փոթորկալից ուկեան, իրեն սրտին մէջ փրփրացող ալիքների շառաչիւնի հազիւ մի մասն էր մեզ հաղորդում այդ անյաղթելի փոթորիկներից թուլացած կրծքից: Մեր պարտականութիւնն է յարգել, անջնջելի անել մեր սրտից այդ մեծ մարդու՝ հայրենասիրի յիշատակը, տպագրել մեր սրտի տախտակի վերայ նրա երկնային պատգամները և մաղթել Արարչին, որ նրան երկնային հանգիստ պարգևի և նրա գերեզմանի իւրաքանչիւր փոշուց նրա պէս արժանաւոր զաւակներ պարգևի ազգին: